

www.BibleForChildren.org

मती 8



तेसर दिन गालिल परदेसके काना सहरके एकटा घरमे बियाह छेलै। येसुके माँ सेहो ओतै रहै। येसु आ ओकर चेलासबके बियाहमे नौता देने रहै।



बियाहेके दिन अङ्गुरके मध ओरेलाके बाद येसुके माँ ओकरे कहलकै, “अङ्गुरके मध त ओरागेल!” येसुके माँ नोकरसबके कहलकै, “येसु जे कहैछौ, तुसब ओहिनड कर।”



येसु नोकरसबके कहलकै, “सब घैलासब पानीसे उटुड-टुटुड कैरके भैरदहै।” उसब जम्मे घैलासबमे मुहतक पानी भैरदेल्कै। उ ओइसबके कहलकै, “यि कन्हिकरा निकाइलके भोजके माइनजनके दहै।” तब उसब कन्हिकरा लज्याके माइनजनके देल्कै।



जब माइनजन उ पानी चाखलकै त अङ्गुर मध बैनगेल छेलै।
महज यि मध कतेसे आनलकै से उ नै जानलकै। यि बात त
पानी भरैबला नोकरसब जानैछेलै।

तब माइनजन बरके बोल्याके
कहलकै, “सब लोक पहिने
असल्का मध पियैले दैछै आ
जब लोकसब बहुते पिलैछै,
तब मातरे दबका पियैले
दैछै, महज अहाँ त
असल्का अखुनतक
राखने चियै।”




अहिनडे येसु सबसे पहिन्का अजगुतके काम
गालील परदेसके (परगना) काना सहरमे
करलकै। उ आपन महिमा परगट
करलकै, तब ओकर चेलासब
ओकर उपर बिस्बास करलकै।



तकरबाद येसु पतरुसके घरमे गेलै। ओइ
बखत पतरुसके सौसके जर बोखारसे ओकरा
बिछोनामे परल देखलकै।



येसु ओकर हाथ छुबलकै आ जर बोखार ओकरा छोड़रदेलकै।
तब उ उइठके ओकरा सेवा-सत्कार करलकै।




रौद डुब्लाके बाद साँझमे बहुत किसिमके रोगी-बिमारीसब
आ भुत लागल लोकसबके येसु लग आनलकै। पुरे सहरके
लोकसब घरके अडनामे
भिर लागल छेलै।



येसु बहौत किसिमके रोगी-बिमारीसबके निक करलकै आ
भुतोसबके निकाललकै महज उ खिस्याके भुतसबके बोले नै
देलकै कथिलेत उसब ओकरा चिन्हैछेलै।



तकरबाद भिरके सब लोकसब येसुके छुबैले चाहैछेलै कथिलेत
ओकरसे सक्ती निकलैतरहै तैसे सब लोकसब निक हैछेलै।



ओह्या बखत चारटा लोक एक गोरे लकबा मारल लोकके लके ओकरलग एलै।



लोकसबके भिरके कारन ओकरलग
जाइले कतौसे रस्ता नै भेटलाके बाद
उसब छाइन्हमे चहैरके रस्ता बनाइलकै
तब बिमारीके ओकर झोल्डा
सहित निचा झाइरके येसुके
अगामे राखलकै।




आपन उपर लोकसबके एहेन बिस्वास करल देखके येसु कहलकै, “हे पिरिय, तोहर पापसब छमा भेल छौ।” “तु उठ! आपन झोल्डा उठा आ बोइकके घर जो!”



तकरबाद येसु नाहमे चहरलै आ चेलोसब ओकर पछा-पछा
गेलै। तब अचानक तालमे बरका
अन्हर-बिहाइर चल्लै आ पानीके
ढेहसे नाह डुबेलाग्लै।
महज येसु सुतल छेलै।



महज येसु ओकरासबके कहलकै, “कथिले तुसब डेराइचिही?
तोरासबके बिस्वास कते गेलौ?” तब येसु उइठके अन्हर-
बिहाइर आ तालके हप्केलकै, आ अन्हर-बिहाइर एकदम सान्त
भ्यागेलै। यि देखके चेलासब छक्क परलै आ
कहलकै, “यि केहन लोक छै?
अन्हर-बिहाइर आ झोहोसबके
आग्या करैछै त
माइन जाइछै।”



कथिलेकी परमेस्वर सन्सारके लोकसबके
एहेन परेम करलकै कि उ आपन एकलौता
बेटाके देलकै। ओकर उपर बिस्वास
करैबला नास नै हेतै, महज उ
अनन्त जिबन पाबतै।



रोमी 3:23 कथिलेत सबलोक पाप करने छै आ परमेस्वरके महिमा तक पुगैले चुकल छै।

रोमी 6:23 कथिलेत पाप करैबलाके बैन मिरतु चियै, महज फोक्टेमे देल परमेस्वरके बरदान त अनन्त जिवन चियै जे अपनासबके परभु येसु खिरिस्टमे देनेछै।

हिबरु 9:27 जहिनड लोकसबके एकबेर मरनाइ निश्चित छै तहिनड मरलाकेबाद ओकर नियाय निश्चित छै।

एफिसी 2:8,9 कथिलेकी परमेस्वरके अनुगरहसे तुसब बिस्वाससे बच्याल गेलचिही। तुसब आपनेसे कोसिस कैरके नै, यि त परमेस्वरके देल बरदान चियौ। यि तोरासबके कामसे नै भैलछौ, नै त लोक घमन्ड करतियै।



रोमी 10:9,10 यदि तु येसुके हमर परभु चियै कहके आपन मुहसे सुइकार करबिही आ परमेस्वर ओकरा मरलसे जिबित करलकै कहके आपन हिरदयमे बिस्वास करबिही त तोहर उधार हैतौ। कथिलेत लोक आपन हिरदयसे बिस्वास कैरके परमेस्वरके अगा धरमी ठहरैछै आ बिस्वास करल बात आपन मुहसे सुइकार कैरके उधार पाबैछै।

युहन्ना 3:16,17 कथिलेकी परमेस्वर सन्सारके लोकसबके एहेन परेम करलकै कि उ आपन एकलौता बेटाके देलकै। ओकर उपर बिस्वास करैबला नास नै हैतै, महज उ अनन्त जिबन पाबतै। परमेस्वर त आपन बेटाके सन्सारके दोसी ठहराबैके लेल नै महज ओकरसे सन्सारके लोकसब बचे कहके पठेलकै।

1 युहन्ना 5:11-13 उ साक्छी यि चियै कि परमेस्वर अपनासबके अनन्त जिबन देने छै आ उ जिबन ओकर बेटामे छै। जकरसडे परमेस्वरके बेटा छै, ओकरसडे जिबन छै आ जकरसडे परमेस्वरके बेटा नै छै ओकरसडे जिबन नै छै। तुसब परमेस्वरके बेटाके नाममे बिस्वास करैबलासबके हम यि चिठी लिखैचियौ, ताकी तुसब अनन्त जिबन पाबनेचिही कहके थाह हेबे।



मती 8-9; मरकुस 1-2, 4; लुका 4, 8; युहन्ना 2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: E. Frischbutter; Sarah S.

Tharu Kochila NT (thq) © Wycliffe Bible Translators, Inc. All
rights reserved.

<https://www.bible.com/bible/3290/MAT.1.MTH>

©2025 Bible for Children, Inc.

www.M1914.org

www.bibleforchildren.org

